

Eu non lausarai ja mon chan

- letto 1422 volte

Edizioni

- letto 981 volte

Aston

Eu non lausarai ja mon chan;
mas si·us agrada ni bons es,
l'amor, que m'a en son coman,
en sapchatz grat, qu'a mi non ges,
car amors me guid' e m'enansa.
E si·m da trabalh e pezansa,
eu viu jauzens, quan muor aman.

Midonz per sa franchisesa gran
plac que receup mon homenes,
e·m fes e·m dis e·m promes tan
qu'ieu non cuidei c'om mi valgues.
Mas eras estau en doptansa
que per non-cur' o per viltansa
m'oblit o qe·m met' en soan.

Molt fui autz, mas ar vau baissan.
Dire puosc q'enaissi m'es pres
com celui que vai joy sonian
e quan rissida, non es res.
On trobarai jamais fiansa
en neguna bella semblansa
pois en aquesta trob engan?

Trop dic; non puesc als, que mort m'an
atendres e longa merces.
Que farai donc deserenan?
Degra m'en partir si pogues,
mas, mentre n'estauc en balansa,
si me loigna desesperansa,

fin'amors m'apropch' atretan.

Sofrir m'er la pen' e l'afan
totz temps, non pas dos jorns ni tres,
anz c'aillors vire mon talan,
qe-l maltraitz val totz autres bes.
Sol de vos, don', ai deziransa
que-m donetz joy e alegransa;
cosseill el mon plus non deman.

Ja drutz non conosca son dan
s'esser vol savis ni cortes,
ni fassa ni diga semblan
que res contra sidons li pes;
car cel enqier sa malanansa
qui per orgoill cuida vengansa
penre aqui on hom no-l blan.

Dona, ren no val ni enansa
en amor trop long'esperansa;
qui ama, faire-n deu semblan.

- letto 947 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/eu-non-lausarai-ja-mon-chan>